

Descarga a túa Palabra no corazón

Hoxe, Señor, como os discípulos de Emaús queremos que descargues a túa Palabra nos nosos corazóns para que se nos abra o entendemento e comprendamos o que nos pasa cada día.

Só a túa Palabra pode facer que entremos na nova era da Resurrección.


Só a túa Palabra fainos recoñecerte vivo e presente no medio de nós.

Grazas por regalarnos e explicarnos todo o que din as Escrituras, pola oportunidade de conectar ese "pendrive" maravilloso que posibilita a conexión do noso corazón a un mundo novo: a túa Resurrección.

Descarga en nós, Señor, o empuxe da túa Palabra, para que non andemos sen rumbo, desacougados, perdidos.

Para que a alegría, a paz, o perdón inunden a nosa existencia.

Para que ningún virus poida atacar a nosa esperanza. Transforma a nosa mente, Señor, coa elocuencia da túa Palabra, marcada pola Cruz e pola Vida.



Evanxeo
15-abril-2018
3º-PASCUA-B



A PALABRA anúncianos que resucitou e **VIVE**.
El explica as Escrituras e todo cobra **SENTIDO**.

3º Pascua 18



FEITOS 3, 13-15.17-19: *Matastes o autor da vida, pero Deus resucitouno de entre os mortos.*

Naqueles días, Pedro dixo ao pobo: «O Deus de Abrahán, de Isaac e de Xacob, o Deus dos nosos pais, glorificou o seu servo Xesús, ao que vós entregastes e de quen renegastes ante Pilato, cando decidira soltalo. Vós renegastes do Santo e do Xusto, e pedistes o indulto dun asasino; matastes o autor da vida, pero Deus resucitouno de entre os mortos, e nós somos testemuñas diso. Agora ben, irmáns, sei que o fixestes por ignorancia, do mesmo xeito que as vosas autoridades; pero Deus cumpríu deste xeito o que anunciara polos profetas, que o seu Mesías tiña que padecer. Xa que logo, arrependídevos e convertédevos, para que se borren os vosos pecados». *Palabra do Señor.*

SALMO 4: *Fai brillar sobre nós, Señor, a luz do teu rostro.*

1º XOÁN 2,1-5: *El é vítima de propiciación polos nosos pecados e tamén polos do mundo enteiro.*

LUCAS 24, 35-48: *Así está escrito: o Mesías padecerá e resucitará de entre os mortos ao terceiro día.*

Narrador: Naquel tempo, os discípulos de Xesús contaron o que lles pasara polo camiño e como o recoñeceron ao partir o pan. Estaban falando destas cousas, cando el se presentou no medio deles e díxolles:

Xesús: -«Paz convosco».

Narrador: Pero eles, aterrorizados e cheos de medo, crían ver un espírito. E el díxolles:

Xesús: -«Por que vos alarmades?, por que xorden dúbidas no voso corazón? Mirade as miñas mans e os meus pés: son eu en persoa. Palpádeme e dádevos conta de que un espírito non ten carne e ósos, como vedes que eu teño».

Narrador: Dito isto, mostroulles as mans e os pés. Pero como non acababan de crer pola alegría, e seguían atónitos, díxolles:

Xesús: -«Tendes aí algo para comer?».

Narrador: Eles ofrecéronlle un anaco de peixe asado. El tomouno e comeu diante deles. E díxolles:

Xesús: -«Isto é o que vos dixen mentres estaba convosco: que era necesario que se cumprise todo o escrito na Lei de Moisés e nos Profetas e Salmos sobre min».

Narrador: Entón abriulles o entendemento para comprender as Escrituras. E díxolles:

Xesús: -«Así está escrito: o Mesías padecerá, resucitará de entre os mortos ao terceiro día e no seu nome proclamarase a conversión para o perdón dos pecados a todos os pobos, comezando por Xerusalén. Vós sodes testemuñas de isto».

Palabra do Señor

(Narrador-Xesús)



A PALABRA anúncianos que resucitou e VIVE. El explica as Escrituras e todo cobra SENTIDO.

1. VER: Hai palabras e palabras.

-Todos sabemos que non son o mesmo as palabras que oímos na rúa ou na tele que as que nos din as persoas que queremos: pais ou amigos.

Son para ti todas as palabras igual de importantes? Recordas algunha frase importante de teus pais, avós ou amigos?

2. XULGAR: Xesús deixounos a Palabra de Deus.

-Xesús, o domingo, trala resurrección, preséntase por segunda vez no medio dos apóstolos, saúdaos coa paz e eles crían que era unha pantasma. Pero el **móstralles as súas mans** e os seus pés aínda chagados polos cravos e **fálalles**, enchéndoo de ledicia. Logo come con eles, explícalles as Escrituras e **“abriulles o entendemento para comprendelas”**.

QUE NOS QUERE DICIR?

-O domingo é o día en que a comunidade se reúne e Cristo faise presente no medio de nós a través da súa Palabra.

-Cristo **regálanos a súa Palabra**, a palabra máis importante da semana, porque é Xesús mesmo o que as di: que bonitas son as túas palabras!

-A **Palabra de Deus ábrenos a mente**, axuda a entender o que nos sucede, a nosa vida e o que pasa ao noso ao redor, con mirada divina.

-“**Descargamos**” a **Palabra de Deus na nosa vida** para que nos ilumine, nos encha de forza, nos anime, revise o mal feito... A ledicia, a paz, e o perdón inundarán a nosa vida.

-E así andemos o camiño da santidad ao que nos invita o papa Francisco coa nova exhortación apostólica.

Escoitas con atención a Palabra de Deus? Que encontras nela?

3. ACTUAR: Descarga a súa Palabra no teu corazón!

-Presta atención ao que che di a Palabra de Deus cada domingo e que quere cambiar en ti. -Pensa que Cristo non só está presente na misa no Pan senón tamén na Palabra de Deus. -En grupo axudamos a toda a comunidade a valorar a Palabra e a responder ben e con forza a: “Palabra do Señor”.

Que imos facer?